



JUMUIYA ya Kikrito Tanzania (CCT ), imesema kuwa, inatiwa moyo na jitihada za Serikali katika kushughulikia kwa juhudi kubwa na kwa uwazi masuala ya msingi yahasuyo ustawi na mstakabali wa nchi, hasa katika demokrasia, haki za binadamu na utawala wa sheria.

Kauli hiyo imetolewa na Makamu wa Kwanza wa Mwenyekiti wa Jumuiya hiyo, Askofu Dk. Stanley Hotay, wakati akifungua Mkutano Halmashauri Kuu ya 56 ya Jumuiya hiyo uliofanyika wiki iliyopita mkoani Morogoro, kwenye kituo cha Mafunzo kwa Wanawake cha Kumbukumbu ya Askofu Theofilo Kisanji.

Askofu Dk. Hotay alisema kuwa serikali iliyoko madarakani imeendelea kuwatetea na kuwafikishia huduma za kijamii Watanzania hasa wenye hali duni na kwamba CCT imeona jitihada katika ufuatiliaji wa kero mbalimbali za wananchi na kuzitatua kama vile, ulipaji wa kodi, kuilinda amani ya nchi na usalama wa wananchi.

CCT ilieleza kufurahishwa na dhamira ya Rais Samia Suluhu Hassan ya kuona Watanzania wanaishi kwenye maridhiano na maelewano. Katika hotuba yake ya ufunguzi wa Mkutano huo, Askofu Dk. Hotay alirejea hotuba ya Rais

aliyoitoa Julai Mosi mwaka huu, wakati Tanzania ikitimiza miaka 30 tangu iliporejea kwenye mfumo wa vyama vingi vya siasa.

“Katika hotuba hiyo iliyosheheni dhamira ya kuona jamii ya Watanzania inayopenda maridhiano na maelewano, ustahimilivu katika ujenzi wa uchumi imara, mabadiliko katika sheria na kujenga upya jamii yenye uzalendo. Sisi wana Jumuiya ya Kikristo Tanzania, tunaona kuwa dhamira hii ya Mhe. Rais itakamilishwa endapo kutakuwa na utashi wa dhati kwa viongozi wa kisiasa katika ngazi zote na vyama vyote vya kisiasa,” alisema.

Mwanzoni mwa mwezi huu, Rais Samia Suluhu Haasan aliandika Makala kuhusu miaka 30 ya vyama vingi vya siasa nchini Tanzania na kubainisha maeneo ya mafanikio, changamoto na hatua ambazo Serikali inapaswa kuzichukua ili kutatua changamoto hizo.

Katika makala hayo yenye maneno 953, Rais Samia alisema uamuzi wa kuanzia vyama vingi nchini Tanzania unatoa somo zuri za kiuamuzi kwani busara za aliyekuwa Rais kipindi hicho, Mzee Ali Hassan Mwinyi ziliweka kando asilimia 80 ya idadi ya waliotaka mfumo wa chama kimoja na kuzingatia maoni ya waliotaka mabadiliko ambao walikuwa ni asilimia 20 tu.

“Kwenye jambo la maslahi ya nchi, maarifa na busara ndiyo muhimu kuliko namba,” aliandika Rais Samia katika makala yake ambayo ilichapishwa katika vyombo vya habari kadhaa nchini hasa magazeti ya kila siku. Rais Samia aliongeza: “...Badala ya kusikia sauti moja na wakati mwingine tukisema “Zidumu Fikra za Mwenyekiti”.

Sasa Watanzania wanasikia kuhusu fikra za sauti tofauti. Kwa bahati nzuri, hata Mwenyekiti Mao alipata kusema “acha maua 100 yamee kwa pamoja”. Askofu Dk. Hotay alisema kuwa CCT kama sehemu ya Kanisa la Tanzania, inao wajibu wa kuishauri Serikali na viongozi wake wa kisiasa kuhusu namna bora ya kuenenda na kuongoza sawasawa na mapenzi ya Mungu lakini katika kutekeleza wajibu huo wanapaswa kufanya hivyo kwa staha, hekima, unyenyekevu wote na upole, kwa uvumilivu na kuchukuliana katika upendo.

Askofu huyo alisisitiza umoja ndani ya Mekanisa wanachama wa jumuiya hiyo kwa ajili ya kuwapa nguvu, maendeleo na utengemano.

“Yesu mwenyewe anatuomba katika Yohana 17:21 kwamba tuwe na umoja ili ulimwengu upate kusadiki kuwa Baba ndiye aliyemtuma yeye ulimwenguni, hivyo basi ni dhahiri kabisa kwamba pasipo umoja, hatuwezi kutimiza kusudi letu kama Kanisa hapa duniani,” alisema.

Katika Mkutano wa Halmashauri Kuu na Mkutano Mkuu uliopita CCT ilisisitiza kuendeleza umoja katika kujimarisha kwenye maeneo makubwa matatu ambayo:-katika kueneza Neno la Mungu na maendeleo ya jamii ya Watanzania kwa kuimarisha uongozi wa CCT kwenye mikoa.

Pia ulisisitiza kujitegemea kiuchumi na kupunguza utegemezi wa uhisani katika kuendesha shughuli na kazi za Jumuiya kwa kuwekeza kibiashara katika nyanja mbalimbali na kuimarisha na kuhimiza malezi ya vijana kwa kufundisha elimu ya Kikristo shuleni na vyuoni pamoja na huduma za kichungaji vyuo vikuu.

Mkutano huo ulimchagua Baba Askofu Musa Magwesela wa Kanisa la African Inland Church of Tanzania (AICT ), ambaye pia ni Askofu wa Dayosisi ya Geita, kuwa Makamu wa Pili wa Mwenyekiti wa Jumuiya hiyo kuchukua nafasi ya aliyekuwa akiishikilia nafasi hiyo, Askofu Alinikisa Cheyo ambaye amestaafu.

## KAULI YA RAIS SAMIA

Katika Makala yake Rais Samia alisema katika uongozi wake anaamini katika kile kinachojulikana kama 4R - ikiwa ni ufupisho wa maneno manne ya lugha ya Kiingereza; Reconciliation (Maridhiano), Resiliency (Ustahamilivu), Reforms (Mabadiliko) na Rebuilding (Kujenga Upya).

Kuhusu maridhiano Rais alisema yeye haamini katika misimamo isiyobadilika iwe kwa mwanasiasa, kiongozi au mwananchi wa kawaida hasa kuhusu

mambo yenye maslahi kwa Taifa na kwamba msimano au hali fulani inaweza kueleweka au kukubalika wakati fulani lakini si wakati wote.

“ Si wakati wakati wote ni wa kupongezana na si wakati wote ni wa kupingana. Kwenye kujenga Tanzania bora natamani kujenga jamii yenye maridhiano na maelewano. Natamani kujenga umoja pasipo kujali tofauti zetu za kisiasa, kidini, kikabila na nyingine zote. “Hili litawezekana kwa kujenga jamii inayopata haki sawa mbele ya sheria, isiyobaguana na inayotoa fursa sawa za kiuchumi kwa wote. Ninaamini maridhiano hayawezi kupa tikana penye ubaguzi na pale, ambapo kuna wanaokosa fursa na haki zao za kiuchumi na kiraia,” aliandika Rais Samia.

Aliongeza kwamba huko tuendako nchi inaweza kutikiswa na kuyumbishwa iwe kiuchumi, kimazingira, kijamii au kisiasa, lakini ni lazima uwepo ustahimilivu. “Hii ni kwa sababu hakuna nchi nyingine zaidi ya hii na hapa ndiyo kwetu.

Nilitiwanguvu sana namna walivyopokea tukio la Royal Tour kwa uzalendo wa kipekee,” alisisitiza.

Kuhusu mabadiliko, Rais Samia alisema amedhamiria kuenzi miaka 30 ya demokrasia ya vyama vingi kwa kuongoza Serikali kufanya mabadiliko katika mifumo ya kisiasa, kiuchumi na katika sheria zetu za uchaguzi.

“Lengo ni kwamba Tanzania yetu iende na wakati na kama ilivyokuwa wakati mwingine, tujue mapema ni wakati gani wa kufanya jambo, hata kama si watu wanaliunga au hawaliungi mkono kwa wakati husika. “Mabadiliko katika sheria zetu za uchaguzi, yataleta ushindani wa haki na kuwapa watu fursa ya kuwachagua wawatakao kuwaongoza. Kwenye uchumi, mabadiliko yatakuwa a lengo la kutoa fursa zaidi kwa watu wengi zaidi kunufaika kiuchumi badala ya wachache”, alisisitiza.